

漢詩音註

漢詩音註目錄卷之九

無名氏

諺語

附

楚人諺

逐彈丸

紫宮諺

路溫舒引諺

崔實引里語

東家棗

鄒魯諺

諸葛豐

三王

五鹿

谷樓

張文

楊伯起

幘如屋

投閣

杜陵蔣翁

竈下養

南陽謠

戴侍中

井大春

劉太常

楊子行

許叔重

馮仲文

江夏黃童

白眉

魯國孔氏

胡伯始

避驄

考城諺

朱伯厚

太常妻

縫掖

荀氏八龍

公沙六龍

帳下壯士

郭君

柳伯騫

繆文雅

許偉君

王君公

時人語

相里諺

袁文開

五門

賈偉節

作奏

李鱗甲

諸葛諺

郭氏語
以下增

少林

石里

雷陳

游幼齊

封使君

孔明

全明六載

勢平保士

漢詩音註卷之九

頻陽李因篤子德評

洽陽王梓適菴校

莘野康乃心孟謀閱

無名氏

諺語

附

楚人諺

漢書曰季布爲任俠有名楚人諺曰

得黃金百不如得季布諾

逐彈丸

西京雜記曰韓嫣好彈以金爲丸一日所失者十餘長安爲之語云云京師兒童每聞嫣出彈輒隨之望

丸所落便拾取焉

苦饑寒逐彈丸

紫宮諺

漢書曰李延年善歌能爲新聲與女弟俱幸武帝時人語曰

一雌復一雄雙飛入紫宮

路溫舒引諺

初孝武之世張湯趙禹之屬條定法令禁網寢密宣帝時廷尉史路溫舒上書

畫地爲獄議不入刻木爲吏期不對

崔實引里語

政論曰每詔書所欲禁絕雖重懇惻罵詈極筆猶復廢捨終無悛意故里語曰

州郡記如霹靂得詔書但掛壁

今古一轍近代謠云朝奉詔旨夕爲故紙可浩歎也

東家棗

漢書曰王吉少時居長安其東家有棗樹垂吉庭中吉婦取以啖吉吉知而去婦東家聞欲伐其樹鄰里共止之因請吉還婦爲之語云云吉字子陽琅琊阜虞人昭帝時爲博士諫大夫

東家棗樹王陽婦去東家棗完去婦復還

鄒魯諺

漢書曰韋賢少子玄成復以明經歷位至丞相故鄒魯諺曰

遺子黃金滿贏不如一經

贏與籛同

諸葛豐

漢書曰諸葛豐元帝擢爲司隸校尉刺舉無所避京師語曰

問何闊逢諸葛

言人相畏避不得數數過從也

三王

漢書曰成帝時王吉子駿爲京兆尹試以政事先是京兆有趙廣漢張敞王尊王章至駿皆有能名故京

師稱曰

前有趙張後有三王

五鹿

漢書曰少府五鹿充宗貴幸爲梁丘易元帝好之欲考其異同令與諸易家論充宗辯口諸儒莫能抗有薦朱雲者召入攝齊升堂抗首而請音動左右故諸儒爲之語曰

五鹿嶽嶽朱雲折其角

谷樓

漢書曰樓護字君卿精辯論議常依名節聽之者皆竦與谷永俱爲五侯上客長安號云云言其見信用也

谷子雲筆札樓君卿喉舌

張文

漢書曰成帝爲太子及卽位以張禹論語爲師以上難數對以問經爲論語章句獻之諸儒爲之語云云由是學者多從張氏餘家寢微

不欲爲論念張文

楊伯起

東觀漢記曰楊震少學受歐陽尚書於太常桓郁經明博覽無不窮究諸儒爲之語曰

關西孔子楊伯起

幘如屋

蔡邕獨斷曰古幘無巾王莽頭禿乃始施巾故語曰

莽頭禿幘如屋

投閣

漢書曰王莽篡位後復上符命者莽盡誅之時楊雄校書天祿閣使者欲收雄雄恐乃從閣自投幾死京師爲之語曰

惟寂惟莫自投于閣爰清爰靜無作符命

杜陵蔣翁

嵇康高士傳曰蔣翊字元卿杜陵人爲兗州刺史王莽爲宰衡詡奏事到灞上稱病不進歸杜陵荆棘塞門舍中三逕終身不出時人諺曰

楚國二龔不如杜陵蔣翁

竈下養

東觀漢記曰更始在長安所授官爵皆羣小賈人或膳夫庖人長安爲之語曰

竈下養中郎將爛羊胃騎都尉爛羊頭關內侯

南陽諺

後漢書曰南陽太守杜詩政治清平百姓便之又修治陂池廣拓土田郡內比室殷足時人以方召信臣南陽爲之語曰

前有召父後有杜母

戴侍中

謝承後漢書曰戴憑徵博士詔公卿大會羣臣皆就席憑獨立世祖問其意對曰博士說經皆不如臣而

坐居臣上是以不得就席帝令與諸儒難說帝善之
後正旦朝賀令羣臣說經更相難詰義有不通輒奪
其席以益通者憑遂重坐
五十餘席故京師語曰

解經不窮戴侍中

一曰說不窮戴侍中

井大春

嵇康高士傳曰井丹字大春扶風
郿人博學高論京師爲之語曰

五經紛綸井大春

劉太常

華嶠後漢書曰劉愷爲太常論
議常引正大義諸儒爲之語曰

難經伉伉劉太常

楊子行

續漢書曰楊政字子行少好學京師語曰

說經鏗鏗楊子行

許叔重

續漢書曰許慎字叔重性醇篤少博學經籍馬融常推敬之時人爲之語曰

五經無雙許叔重

馮仲文

三輔決錄曰馮豹字仲文後母遇之甚酷豹事之愈謹時人爲之語

道德彬彬馮仲文

江夏黃童

後漢黃香字文彊江夏人博學經典究精道術京師號曰

天下無雙江夏黃童

白眉

襄陽耆舊傳曰蜀馬良字季常宜城人也兄弟五人並有才名鄉里爲之諺良眉中有白毛故以稱之馬氏五常白眉最良

魯國孔氏

孔叢子曰子和二子長曰長彥次曰季彥甘貧味道研精墳典十餘年間會徒數百故時人爲之語曰

魯國孔氏好讀經兄弟講誦皆可聽學士來者有聲名不
過孔氏那得成

胡伯始

太傅胡廣周流四公三十餘年歷事六帝禮任極優練達故事明解朝章雖無謇謇直言之風屢有補闕

之益故京
師諺曰

萬事不理問伯始天下中庸有胡公

廣字伯始

避驄

後漢書曰桓典字公雅靈帝時爲侍御史是時宦官秉政典執正無所回避常乘驄馬京師畏憚爲之語曰

行行且止避驄馬御史

行行而復止亦亂世之音也

考城諺

後漢書曰仇覽字季智一名香陳留考城人爲蒲亭長初到亭有陳元之母詣覽告元不孝覽以善言勸慰之母聞感悔涕泣而去覽乃親到元家與其母子飲因爲陳人倫孝行譬以禍福元卒成孝子鄉邑爲之諺曰

父母何在在我庭化我鴟梟哺所生

鴟一作鳴

朱伯厚

後漢書曰朱震字伯厚爲州從事奏濟陰太守臧罪之數諺曰

車如雞栖馬如狗疾惡如風朱伯厚

詩紀詩乘無惡字

太常妻

應劭漢官儀曰北海周澤爲太常恆齋其妻憐其年老疲病窺內問之澤大怒以爲干齋掾吏叩頭爭之不聽遂收送詔獄并自効論者非其激發諺曰

居世

一作代

不諧爲太常妻一歲三百六十日三百五十九

日齋一日不齋醉如泥旣作事復低迷

縫掖

自此至作奏語並見太平御覽其中有世代不詳者御覽雜置漢人中俟再考訂